



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O IZMJENAMA I DOPUNAMA ODLUKE O ORGANIZACIJI
I DJELOKRUGU ORGANA UPRAVE GRADA SARAJEVA
(Prijedlog)

Predlagač: Gradonačelnica
Obrađivač: Stručna služba gradonačelnice
Grada Sarajeva

Sarajevo, mart 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 50. Zakona o organizaciji organa uprave u Federaciji Bosne i Hercegovine („Službene novine Federacije BiH, broj 35/05), a u vezi sa Zakonom o državnoj službi u Kantonu Sarajevo („Službene novine Kantona Sarajevo“, br. 31/16 i 45/19) te člana 26. stav 1. tačka 2. i 14. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na __. sjednici održanoj __. __. 2022. godine donosi:

(Prijedlog)

**ODLUKU
O IZMJENAMA I DOPUNAMA ODLUKE O ORGANIZACIJI I DJELOKRUGU
ORGANA UPRAVE GRADA SARAJEVA**

Član 1.

(Predmet)

Ovom Odlukom vrše se izmjene i dopune Odluke o organizaciji i djelokrugu organa uprave Grada Sarajeva („Službene novine Kantona Sarajevo“, broj 24/21).

Član 2.

(Dopuna člana 3.)

U članu 3. stav 2. tačka b) brišu se riječi „i razvoj grada“ i dodaje se „tačka j) Gradska služba za održivi razvoj.

Član 3.

(Izmjene i dopuna člana 5.)

U članu 5. stav 1. iza riječi „za opću upravu“, dodaju se riječi „i zajedničke poslove“, a iza riječi „vrši sljedeće poslove“, slijedi tekst:

Gradska služba za opću upravu vrši sljedeće poslove:

Priprema propise i druge akte iz svoje nadležnosti koje donosi Gradsko vijeće i gradonačelnica Grada Sarajeva i stara se o njihovom izvršavanju; prati stanje i pojave u oblasti uprave i predlaže mjere i aktivnosti u toj oblasti; stara se o upotrebi imena i simbola Grada Sarajeva; analizira, inicira, predlaže te učestvuje u izradi i realizaciji planova, projekata i programa u oblastima za koje je osnovana; inicira usklađivanja propisa sa propisima više pravne snage iz svoje oblasti; vrši upravne i stručne poslove i prenesene poslove federalne i kantonalne uprave u skladu sa zakonom; obavlja normativno-pravne, upravne i stručne poslove vezane za radne odnose, upotrebu ljudskih resursa i kadrovsku politiku; obavlja poslove prijave i odjave, kao i promjene stanja državnih službenika i namještenika i lica koji se nalaze na stručnom osposobljavanju te izabranih i imenovanih zvaničnika Grada kod nadležne poreske uprave i Zavoda zdravstvenog osiguranja; obavlja poslove koji se tiču oglasnih i konkursnih procedura prijema u radni odnos; vrši nabavku i distribuciju kancelarijskog potrošnog materijala i ostalih materijalno-tehničkih sredstava te vrši njihovu evidenciju; vrši poslove tekućeg održavanja i uređivanja prostorija (klimatizacija, grijanje, instalacije, održavanje higijene objekata i prostora Grada Sarajeva, protupožarna zaštita, dezinfekcija, dezinsekcija i deratizacija i dr.); vrši poslove održavanja i korištenja voznog parka; vrši poslove pisarnice za potrebe jedinstvenog organa uprave u kojem djeluju gradske službe za upravu kao gradski organi uprave, a što uključuje poslove kancelarijskog i arhivskog poslovanja u skladu sa pozitivnim propisima; daje primjedbe, mišljenja, prijedloge i sugestije prilikom izrade akata koji se odnose na oblast koja obuhvata djelokrug rada službe, a koje donose organi Kantona i Federacije, vrši i druge poslove iz oblasti za koje je osnovana, kao i poslove koje joj u zadatak stavi gradonačelnica.

Član 4.
(Izmjena člana 6.)

Član 6. mijenja se i glasi:

„Gradska služba za lokalnu samoupravu vrši sljedeće poslove:

Prati stanje i pojave u oblasti donošenja i primjene propisa iz oblasti lokalne samouprave te s tim u vezi učestvuje u obezbjeđivanju saradnje Grada sa nadležnim organima općina koje čine Grad, ali i općina koje nisu u sastavu Grada, a imaju zajedničke interese lokalnog karaktera, te obezbjeđuje saradnju sa lokalnim vlastima u najboljem interesu lokalne samouprave u KS, FBiH i BiH; obavlja poslove saradnje sa ombudsmenima iz djelokruga rada Službe; stara se o zaštiti prava na lokalnu samoupravu Grada; poslovi na internoj edukaciji o značaju lokalne samouprave i Grada kao jedinice lokalne samouprave i glavnog grada BiH i FBiH; osigurava saradnju sa vjerskim zajednicama, nacionalnim manjinama, nevladinim organizacijama i udruženjima građana koja nisu iz nadležnosti druge gradske službe; predlaže aktivnosti i zalaže se za poštivanje rodne ravnopravnosti u gradu Sarajevu te vodi brigu o zaštiti ljudskih prava i osnovnih sloboda sa aspekta gradskih nadležnosti; osigurava sprovođenje neposrednog odlučivanje građana putem gradskog referenduma, stara se o realizaciji građanskih inicijativa iz djelokruga Službe; inicira i realizuje saradnju Grada sa asocijacijama, gradovima, vladinim i nevladinim organizacijama i stara se o izvršenju saradnje uspostavljene odgovarajućim aktima iz djelokruga rada Službe; predlaže i stara se o provođenju odluka o uspostavljanju statusa posebnog značaja za Grad Sarajevo za fondacije i udruženja koja su taj status stekla na prijedlog i iz nadležnosti Službe; vrši i druge poslove iz oblasti za koje je osnovana, kao i poslove koje joj u zadatak stavi gradonačelnica.

Član 5.
(Dopuna člana)

Iza člana 13. Odluke dodaje se novi član 13a) koji glasi:

„Član 13a)

(Gradska služba za održivi razvoj)

Gradska služba za održivi razvoj vrši sljedeće poslove:

Prati stanje i primjenu propisa iz oblasti održivog razvoja; prati informacije u vezi dostupnih fondova i javnih poziva na koje Grad Sarajevo može aplicirati sa projektima iz oblasti održivog razvoja; inicira i uspostavlja saradnju sa gradovima, općinama i drugim relevantnim institucijama i organizacijama iz BiH, regiona, Evrope i cijelog svijeta, sa ciljem zajedničkog definisanja projekata, obezbjeđivanja sredstava i implementacije projekata; inicira i uspostavlja saradnju sa četiri bitna stuba u društvu – javnim sektorom, civilnim društvom, privatnim sektorom i akademijom, a u cilju definisanja zajedničkih projekata i procesa koji podržavaju održivi razvoj; predlaže mjere za održivi razvoj Grada, radi na provođenju aktivnosti i apliciranju na relevantne fondove sa projektnim idejama koje doprinose razvoju Grada sa posebnim fokusom na održivi razvoj; implementira odobrene projekte; organizuje i učestvuje na relevantnim događajima iz oblasti održivog razvoja; odaziva se na pozive međunarodnih partnera za učešće u događajima, projektima i procesima iz oblasti održivog razvoja; učestvuje i inicira izradu relevantnih dokumenata iz oblasti održivog razvoja; u saradnji sa relevantnim gradskim službama detektuje prioritete oblasti i projekte Grada Sarajeva te poduzima aktivnosti za obezbjeđivanje dodatnih sredstava za njihovu realizaciju; promoviše sve aktivnosti Grada Sarajeva iz oblasti održivog razvoja; vrši i druge poslove iz oblasti za koje je osnovana, kao i poslove koje joj u zadatak stavi gradonačelnica.

Član 6.
(Brisanje stava)

U članu 22. Odluke stav (2) se briše.

Član 7.
(Važenje osnovnog teksta Odluke)

U ostalom dijelu Odluka o organizaciji i djelokrugu organa uprave Grada Sarajeva („Službene novine Kantona Sarajevo“, broj 24/21), ostaje neizmijenjena.

Član 8.
(Stupanje na snagu)

Ova odluka stupa na snagu osmog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:
Sarajevo, __. __. 2022. godine

OBRAZLOŽENJE

PRAVNI OSNOV

Pravni osnov za donošenje ove odluke sadržan je u preambuli prijedloga iste, a to je:

- član 50. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj 35/05) kojim je propisano da su Gradski organi uprave gradske službe za upravu, da se Gradske službe za upravu mogu osnivati u okviru jedinstvenog gradskog organa uprave te da se Gradski organi uprave i gradske upravne organizacije osnivaju i njihov djelokrug utvrđuje Odlukom Gradskog vijeća o organizaciji i djelokrugu gradskih organa uprave i upravnih organizacija, u skladu sa Zakonom.
- član 26. stav 1. tačka 2. i 14. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojim je propisano da Gradsko vijeće u okviru svojih nadležnosti donosi odluke, druge propise i opće akte i daje njihovo tumačenje, kao i da donosi propis o osnivanju i djelokrugu organa uprave Grada Sarajeva.

RAZLOZI DONOŠENJA

Odlukom o organizaciji i djelokrugu organa uprave Grada Sarajeva, između ostalog, pobliže se regulišu poslovi koji će se vršiti u okviru Gradskih službi, kao osnovnih organizacionih jedinica, a koje se predmetnom odlukom osnivaju.

Dosadašnji rad i funkcionisanje Gradske službe za opću upravu i zajedničke poslove pokazao da su poslovi koji se vrši u istoj preobimni, kako po svojoj vrsti tako i po svojoj sadržini.

Prethodno je osnovni razlog što se u ovom momentu pristupilo izmjenama i dopunama važeće Odluke o organizaciji i djelokrugu organa uprave Grada Sarajeva („Službene novine Kantona Sarajevo“, broj 24/21), s tim što će se poslovi kao što su poslovi nabavki i informatički poslovi vršiti u okviru stručnih službi, koje će također pretrpjeti određene organizacione izmjene.

Pri svemu navedenom, posebno se naglašava činjenica da izmjene koje slijede neće prouzorkovati niti će rezultirati povećanju broja uposlenih, obzirom da će iste vršiti državni službenici i namještenici, uposlenici Grada Sarajeva.

Također, Odlukom se predlaže osnivanje posebne Gradske službe za održivi razvoj.

Naime, ova gradska administracija, i pored brojnih izazova s kojim se suočava u svom radu, u fokus stavlja običnog građanina i poboljšanje kvalitete života u našem gradu. Kako bi se zadovoljile potrebe koje postoje u našoj zajednici, simbolični Budžet Grada Sarajeva je nedovoljan te iz tog razloga posvećujemo posebnu pažnju i ulažemo dodatnu energiju da ojačamo kapacitete Grada Sarajeva u povlačenju dodatnih sredstava iz EU i drugih fondova za projekte koji doprinose održivom razvoju grada i boljim uslovima života u Sarajevu. Do sada je to rađeno putem Odsjeka za pripremu projekata koji je vremenom ostvario značajne rezultate te pozicionirao Grad Sarajevo kao poželjnog i odgovornog partnera na lokalnoj i međunarodnoj sceni. Međutim, obzirom na povećane potrebe koje se javljaju u zajednici s jedne strane, a s druge strane radi međunarodne reputacije Grada Sarajeva kao partnera u projektima koji se tiču održivog razvoja i mogućnosti koje se pojavljuju u vidu novih fondova, ukazala se potreba za osnivanjem zasebne Službe koja će sve ove napore podići na veći nivo i ostvariti još bolje rezultate.

Pitanje održivog razvoja je veoma aktuelno i značajno u cijelom svijetu, a osnivanjem Gradske službe za održivi razvoj, Grad Sarajevo postaje prva jedinica lokalne samouprave u regionu koja će na ovaj

način iskazati opredjeljenje i ozbiljnost u misiji za održivi razvoj kroz koji ćemo Sarajevo učiniti kvalitetnijim za život.

Osnovna postavka održivog razvoja je da se u centar stavlja povećanje kvalitete života pojedinca i sveukupnog stanovništva jednog područja. Cilj je postići ravnotežu kroz zadovoljavanje potreba sadašnje generacije, bez ugrožavanja mogućnosti budućih generacija da zadovolje svoje potrebe. Održivi razvoj se temelji na razumijevanju povezanosti njegova tri temeljna sastavna dijela: društvo, okoliš i privreda. Ravnoteža između ova tri sastavna dijela i njena operacionalizacija u praksi osigurava dugoročan razvoj ljudskog društva u očuvanom okolišu.

Održivi razvoj bi trebao osigurati rješenja u smislu zadovoljavanja ljudskih potreba, postizanja jednakosti, omogućavanja socijalne identifikacije i kulturne raznolikosti te pritom zadržati ekološki integritet, uvažavajući razvoj i zaštitu okoliša.

Predložene izmjene i dopune predstavljaju **prvu fazu** u prilagođavanju organizacije i djelokruga rada organa uprave Grada Sarajeva uočenim realnim potrebama stabilne i efikasne uprave, a što je bio i uvijek će biti primarni cilj u radu i djelovanju gradonačelnice Grada Sarajeva. U periodu koji je pred nama, Gradskom vijeću će biti predložena i dostavljena na razmatranje i odlučivanje možda i u potpunosti nova Odluka, a što će zavisiti od zapažanja i uočenih prednosti i mana u radu i djelovanju Gradske uprave. Na ovaj način, organi Grada Sarajeva, gradonačelnica Grada Sarajeva i Gradsko vijeće Grada Sarajeva, omogućavaju još kvalitetniji i djelotvorniji rad Gradske uprave, a sve u interesu i za dobrobit građana našeg grada, što i jeste naš primaran cilj i uloga.

FINANSIJSKA SREDSTVA

Finansijska sredstva za realizaciju ove odluke obezbjeđuju se u Budžetu Grada Sarajeva.